

ԹԻԻՐԲԻԱՅԻ ՀԱՅՈՅ ՎԱՐԺԱՐԱՆՆԵՐԻ ԹԻԻԸ
ԱՌ 1-Ն ՅՈՒՆՈՒԱՐԻ 1903 Թ.

Պոլսի հայոց Պատրիարքարանը իւրաքանչիւր տարի յոյս է ընծայում մի «Վիճակացոյց», որի մէջ մանրամասն տեղեկութիւններ են զետեղուած լինում Թիւրքիայի հայոց վարժարանների մասին: Աւելորդ չենք համարում մեր ընթերցողներին ծանօթացնել այդ «Վիճակացոյցի» ընդհանուր թւերի հետ:

Պոլսում վարժարանների թիւը առ 1 յունուարի 1903 թ. հասնում է 40: Այդ վարժարաններում սովորում են 3060 մանչ, 2350 աղջիկ: Երկսեռ աշակերտներից 1777 ձրիավարժ են: Ուսուցիչների թիւն է 194, վարժուհիներինը՝ 111: Այդ բոլոր դպրոցների ամսական ծախքն է 82,865 ղուրուշ:

Այս վիճակացոյցից դուրս են մնում Պոլսի պետական և զանազան հայ դւ օտար վարժարաններ յաճախողները, որոնց թիւն է 1823, հետեւեալ ստորաբաժանմամբ.

- | | | |
|--------------------------------|-----|------------------|
| 1) Պետական վարժարաններ յաճախող | 215 | մանչ |
| 2) Մասնաւոր հայ | » | » 420 » 160 աղջ. |
| 3) Հայ հռոմ. և հայ բող. | » | » 280 » 195 » |
| 4) Օտար | » | » 188 » 280 » |

Հետաքրքրական թւեր են տրւում և գաւառների դպրոցների մասին՝ բաժանուած ըստ առաջնորդական վիճակների:

Մենք այդ առաջնորդութիւնները կը բաժանենք աւելի մեծ աշխարհագրական սահմաններով. Փոքր-Ասիա, Թիւրքաց Հայաստան և Գաղութներ:

Փոքր-Ասիայում (Բանարմայի, Սերաստիայի, Եւֆոկիայի, Գաւթեմոնիայի, Գոնիայի առաջնորդութիւններ) հայոց վարժարանների թիւն է 89, երկսեռ աշակերտների՝ 10,719, ուսու-

ցիւների և վարժուհիների՝ 230, ամսական ծախք՝ 36,478 ղուրուշ:

Թիւրքաց Հայաստանում (Բաղէշի, Երզնկայի, Կամախի, Բայազէտի, Մշոյ, Վանայ, Աղթամարայ, Կարնոյ, Տիգրանակերտի և Բալուէի առաջնորդութիւններ) կան 172 վարժարաններ, 9,975 երկսեռ աշակ., 284 ուսուցիչներ (երկս.), ծախք 31,430 ղուրուշ ամսական:

Մնում է յիշատակել և Կիլիկիայի կաթողիկոսական թեմը, որի մասին տեղեկութիւն տուել ենք անցեալ համարի Արտ. Տես. մէջ:

Տեղեկութիւններ են բերուած նաև հետևեալ Գաղութների մասին.

Եգիպտոսում կայ 2 վարժարան, 440 երկս. աշակ., 23 ուսուցանող (երկս.), ծախք ամսական 14,921 ղ.:

Կիպրոս 3 վարժարան, 100 աշակերտ (երկս.) ծախք 5,304 ղ.:

Բուլղարիա 10 վարժ., 947 աշ., 33 ուսուց., ամսական ծախք 12,723:

Թւերը պերճախօս կերպով յոյց են տալիս, որ թէև Թիւրքիայում ամեն տեղ ջիւր ու ցան կան հայոց ազգային վարժարաններ, սակայն դրանց թիւը և դրանց պահպանութեան համար ունեցած միջոցները չափ խղճուկ են:

S.